

Simposio 35 aña di Tratado Internacional di Derecho di Mucha 20 november 2024

Aruba a uni su mes na e conmemoracion cu 35 aña pasa riba 20 november, lidernan mundial a yega na un acuerdo den un asamblea general di Nacionnan Uni pa proteha e bienestar di tur mucha pa medio di e Tratado di Derecho di Mucha. Mientrastanto e cantidad di pais cu a ratifica e tratado a yega un total di 196 pais cu a transforma e bida di muchanan rond di mundo.

Na aña 2001 Aruba tambe a ratifica e Tratado aki, haciendo asina e compromiso pa proteha e mucha. E mesun aña, gobierno di Aruba a instala e Comision Nacional Derecho di Mucha pa percura cu e cumplimiento di e Tratado ta sosode na un forma coordina y eficiente. E Comision Derecho di Mucha ta consisti di 8 organisacion gubernamental y 2 organisacion no-gubernamental.

E simposio ta un iniciativa di Comision Derecho di Mucha pa asina hunto nos refleha riba articulo 12 en particular:

E derecho pa expresa e opinion libremente den tur asunto cu ta concerni e mucha, na unda ta duna balor adecua na e opinion di e mucha di acuerdo na su edad y madurez. Pa e meta aki e mucha ta haya



specialmente oportunidad di ser scucha den cada procedura hudicial y gubernamental cu ta concerni e mucha, sea directamente of pa medio di un representante of un institucion adecua pa esey, na un manera cu ta compatibel cu e reglanan di procedemento di e derecho nacional.

Durante e simposio articulo 12 a wordo treci den diferente forma. Juez Jojanneke Brandt a elabora riba e proceduranan legal conforme lei

pa scucha e mucha. Psicólogo Antoniette Geerman a duna un presentacion pa loke ta e desaroyo di e mucha. Jorlanny Kelly, Aruba su Minister Hubenil di derecho di mucha a elabora riba e tratado. Nuriarne Arias-Helder, docente na Universidad di Aruba a modera un panel consistiendo di 6 hoben di diferente organisacion cu tin articulo 12 den nan organizacion anca. Aruba Heart Centered Leadership Foundation a presenta un sesion



interactivo y e hoben Philip Johnson Martinez a declama un poema. Hunto cu invitanan presente a conmemora

35 aña di e tratado teniendo na cuenta cu menornan di edad tin e derecho pa expresa nan opinion y wordo scucha.

Sr. Hubert Tiel ta entrega potretnan di aña 1970-2000 *Pa pone riba e plataforma digital Coleccion Aruba*

Durante un evento di gradicimento na e partnernan di Coleccion Aruba, cu Archivo Nacional Aruba (ANA) a organisa, fotografo Sr. Hubert Tiel a haci entrega di su coleccion di potret for di aña 1970 te cu aña 2000 na Archivo Nacional Aruba.

Sr. Hubert Tiel hunto cu Minister di Cultura Sra. Xiomara Maduro a firma e documentonan pa oficialisa e entrega di e potretnan na Director di Archivo Nacional Aruba, Sr. Raymond Hernandez. ANA lo percura pa tur e potretnan wordo poni riba e Plataforma digital Coleccion Aruba bou di nomber di Sr. Hubert Tiel, pa asina tur hende por tin acceso na nan.

Minister di Cultura a gradici fotografo Sr. Hubert Tiel, pa



su bunita gesto y contribucion na nos patrimonio cultural cu ta wordo conserva na manera digital. E mandatario a bisa cu laga esaki ta un inspiracion pa otro fotografo y organisacionnan pa colabora y comparti nan archivo, documento, potret y video

cu ta contene informacion di nos pasado y cultura, pa trece esakinan na Archivo Nacional Aruba. ANA lo percura pa pone nan riba Coleccion Aruba pa asina esakinan por wordo conserva pa nos futuro generacion.

